



Här Fernand Etgen
President vun der Chamber

Lëtzebuerg, den 23. November 2022

Här

President,

Esou ewéi den Artikel 80 vum Chambersreglement et virgesäit, bieden ech Iech, dës parlamentaresch Fro iwwert déi non-formal Bildung am Beräich vun der Jugend un den Här Minister fir Educatioun, Kanner a Jugend weider ze leeden.

D'Jugendarbecht zu Lëtzebuerg baséiert op de pedagogesche Prinzipie vun der non-formaler Bildung an ass e wichtege Pilier an der perséinlecher a sozialer Entwécklung vun de Jonken.

Am Norde vum Land ass Nordstadjugend a.s.b.l. an 12 Gemengen responsabel fir déi regional Vernetzung a Koordinatioun vun der Jugendarbecht an den Nordstadgemengen an doriwwer eraus. Mat verschiddene Services, déi sech u Jonker am Alter tëscht 12 a 26 Joer richten, droen si de Besoine vun deene Jonke Rechnung a suergen derfir hiert Wuelbefannen ze erhalen an ze verbesseren. Noutwendegkeet déi Jugendlech do opzefänke wou se grad stinn, ass no der Pandemie an an dësen Zäite vun diverse Krisen onëmgänglech.

An dësem Kontext war geplangt d'Offer vum Service vum „Jugendinfopunkt“ (JIP), deen och Süden an am Zentrum vum Land funktionéiert, weider auszubauen. E Konzept gouf zesumme mam Ministère ausgeschafft an och guttgeheescht. Laut mengen Informatiounen, hätt de Ministère aus budgetäre Grënn awer elo decidéiert dem JIP déi néideg personal-teschesch Ënnerstëtzung net zoukommen ze loossen. Dëst nodeems Viraarbechten zesumme mat de Verrieder vum Ministère de Projet sprochräif opgestallt hunn.

Och de Projet vum „Nordstad Streetwork“, der opsichender Jugendarbecht, deen am am Joer 2023 sollt lancéiert ginn a wou zwee „Outreach Youthworker“ sollten an den Asaz komme fir déi Jugendlech nach besser do opzefänke wou se sech grad befanne wier fir 2023 gestrach ginn.

An dësem Kontext géif ech gäre folgend Froen un d'Regierung stellen:

- Kann den Här Minister des Informatiounen bestätegen?
- Wat sinn déi konkret Grënn, dass déi uewegenannte Projet'en vum Ministère nächst Joer net zousätzlech ënnerstëtzt ginn?
- Handelt et sech em en Eenzelfall oder gëtt generell am Beräich vun der non-formaler Bildung bei neie Projet'en gespuert?

- Wa jo firwat gëtt net zousätzlech an dëse Beräich vun der non-formaler Bildung investéiert?
- Wei ass fir Regierung generell de Stelleväert vun der non-formaler Bildung am Beräich vun der Jugend ?

Här President ech bieden Iech mäin déifste Respekt unzehuelen.

A handwritten signature in black ink, appearing to be 'J.P. Schaaf', written over a horizontal line.

Jean-Paul Schaaf
Deputéierten



Äntwert vum Minister fir Educatioun, Kanner a Jugend, Claude Meisch, op d'parlamentaresch Fro Nr. 7230 vum honorabelen Deputéierte Jean-Paul Schaaf

Ad 1) an 2)

Dës Informatiounen kënnen esou net bestätegt ginn. Déi genannte Projete kréien am Joer 2023 eng zousätzlech Ënnerstëtzung.

Ad 3) a 4)

De Contraire ass de Fall, well och am Joer 2023 wäerten nei Projete realiséiert ginn. Fir d'Joer 2023 ass virgesinn, datt zousätzlech 27,25 ETP-Posten am Jugendsecteur zesumme mat de Gemenge geschafe ginn.

Wéi och an de Jore virdrun, gouf de Secteur vun der Jugendarbecht invitéiert, nei Projeten an Iddie fir déi nächst Joren dem Ministère fir Educatioun, Kanner a Jugend (MENJE) matzedeelen, wourop am Aklang mam Staatsbudget muss decidéiert ginn, wat d'Prioritéit sinn a wat ka realiséiert ginn. Wéi an der Vergaangenheet kënnen deemno net ëmmer all Iddien an Initiative realiséiert ginn, dat well de Staatsbudget limitéiert ass.

Ad 5)

An de leschte Joren huet d'Regierung, a virop de MENJE, an Zesummenaarbecht mat de Gemengen, vill an den Ausbau an d'Weiderentwécklung vum non-formale Bildungsberäich investéiert an dësen Engagement bleift och weiderhi bestoen. Souwuel am Klengkandberäich, dem Beräich vun de Schoukanner ewéi och an der Jugendarbecht goufen et an de leschten Joren eng ganz Rei Reformen an innovativ Programmer an Projeten, Initiativen déi och weider gefërdert ginn.

Lëtzebuerg, den 23. Dezember 2022

De Minister fir Educatioun,
Kanner a Jugend

(s.) Claude MEISCH